

25 March 2025

समे 18:15 Hrs

<><><><><><>

Headlines

- केंद्री गृह मंत्री अमित शाह होरें आखेआ जे जम्मू-कश्मीर च अलगाववाद हून पुरानी गल्ल ऐ।
- भारत नै संयुक्त राष्ट्र दी चर्चा च कश्मीर बारै पाकिस्तान दी टिप्पणी दी नुक्ताचीनी कीती। औदे दावें ते आतंकवाद गी सेई ठहराने आहली टिप्पणी गी खारिज कीता।
- कठुआ जिले च आतंकवादिएं गी फगड़ने लेई त्रीए रोज बी तपाशी अभियान जारी। जम्मू-कश्मीर विधानसभा नै अखराजातें सरबंधी बिल ते जीएसटी संशोधन बिल पास कीते।
- 2018-19 च खेलो इंडिया सकीम तैहत 4 प्रोजेक्टें लेई 14 करोड़ 75 लक्ख रपे जारी कीते गए, आखेआ मंत्री सतीश शर्मा होरें।

<><><><><><>

J&K Amit Shah

केंद्री गृह मंत्री अमित शाह होरें आखेआ जे जम्मू-कश्मीर च अलगाववाद हुन इतिहास बनी चुके दा ऐ। उनें आखेआ जे हरियत कन्नै जुड़े दे 2 संगठन अलगावावादी गतिविधियां छोड़ी चुके देन। इसी राष्ट्रीय एकता आहली भेठा इक्क गैंऽ दस्सदे होई शाह होरें सब्भनें समूहें थवां अलगाववाद गी खत्म करने दा आग्रह कीता। उनें इस बदलाव आस्तै प्रधानमंत्री नरेंद्र मोदी हुंदी अगुवाई गी श्रय दिंदे होई आखेआ जे एह शांतिपूर्ण ते एकीकृत भारत आस्तै प्रधानमंत्री हुंदे नजरिए गी दर्शांदा ऐ।

<><><><><><>

India-Pak UN

संयुक्त राष्ट्र सुरक्षा परिषद च भारत दे स्थायी प्रतिनिधि होरें शांति सुधारें पर चर्चा च पाकिस्तान दी टिप्पणिएं गी अनुचित दस्सदे होई आखेआ ऐ जे इयै नेई गल्लें कन्नै पाकिस्तान बन्ने पारा सोयां प्रायोजित आतंकवाद गी सेई नेई ठहराई सकदा। उनें आखेआ जे इयां करियै ओह अपने दावें गी बी वैध ठहराई सकदा। भारत दे स्थाई नुमाइंदें पी. हरीश होरें आखेआ जे पाकिस्तान नै जम्मू-कश्मीर दे इक हिस्से पर गैर कनूनी तरीके कन्नै कब्जा कीते दा ऐ ते पाकिस्तान गी इसी खाली करना चाइदा। भारत नै आखेआ जे जम्मू-कश्मीर मुख्य दा अनचुट हिस्सा ऐ ते म्हेशां बने दा रौहगा।

<><><><><><>

Kathua-Search Operation

कठुआ जिले दे हीरानगर सैक्टर च घुसपैठ करने आहले आतंकवादिएं गी फगड़ने लेई व्यापक तपाशी अभियान अज्ज त्रीए रोज बी जारी ऐ। पुलस महानिदेशक नलिन प्रभात हुंदी अगुवाई च एह अभियान ऐतवारें सरयाल ्रगांऽ च चलाया गेआ हा जित्थे आतंकवादी इक नर्सरी च छप्पे दे हे। सुरक्षाबलें ते आतंकवादिएं बश्कार टाकरा

होआ हा जेदे मगरा एह तपाशी अभियान चलाया गेआ। सेना दे हेलीकाप्टर, ड्रोन, खोजी कुत्ते ते हथियारें कन्नै लेस कमांडो गी अभियान च लाया गेआ ऐ। आतंकवादी मन्नेजजा जा रदा ऐ जे बन्ने पारा थवां खड्डु जां फी सुरंग राएं इत्त भेठा आए हे। सुरक्षाबलें ते आतंकवादिएं बश्कार गोलीबारी बी होई ही।

<><><><><><>

KVK-Poonch

कुदरती राई-बाई आहले राश्ट्रीय मिशन दे हिस्से दे रूपै च कृषि विज्ञान केंद्र पुंछ नै राई-बाई मैहकमे दे सहयोग कन्नै कृषि सखियें आस्तै कुदरती राई-बाई पर 5एं दिनें दे प्रशिक्षण कार्जक्रम दा आयोजन कीता। इस प्रशिक्षण शिविर च 6 कलस्टरें दिएं 12 कृषि सखियें हिस्सा लैता। चीफ साइंटिस्ट डॉ. अजय गुप्ता होरें कुदरती राई-बाई दे महत्व पर लोऽ पांदे होई आखेआ।

<><><><><><>

Reasi-Social Werlfare

कल्याणकारी योजनाएं आहली पैहलकदमिं दे असर ते उंदी अमलावरी गी यकीनी बनाने आस्तै समाज कल्याण मैहकमे दे निदेशक रूपेश कुमार होरें रियासी दे बक्ख-बक्ख दफ्तरें ते संस्थानें दा दौरा लाइयै कम्में दा जायजा लैता। उन्दे दौरे दा उद्देश्य कमजोर समूहें आस्तै चला'रदे कार्जक्रमें दी समीक्षा करना ते उन्दे जीवन स्तर ते सेवाएं च सुधार पर ध्यान केंद्रित करना हा। दौरे दौरान रूपेश कुमार होरें कर्मचारियें ते लाभार्थियें कन्नै गल्लबात कीती ते सामुदायिक कल्याण ते विकास आस्तै मैहकमे दी बचनबद्धता गी पक्का कीता। इस मौके पर उनें आखेआ।

<><><><><><>

Assembly-Bill

जम्मू-कश्मीर विधानसभा च अज्ज अखराजातें सरबंधी बिल पास कीते गए। एहदे राएं 2024-25 ते 2025-26 सरबंधी माले बरे लेई उपलब्ध फंड थवां पैसा लैने दी बत्त पदरी होई गेई। मुख् मंत्री उमर अब्दुल्ला होरें जिंदे कश माली मैहकमे दा कम्मकाज बी ऐ, होरें दवै बिल पेश कीते। इनेंगी ध्वनि मत कन्नै पास करी दित्ता गेआ। विधानसभा नै वस्तु ते सेवा कर सरबंधी संशोधित बिल बी पेश कीता। एहदा मकसद केंद्र शासित प्रदेश दे जीएसटी कनून गी हाल च केंद्र आसेआ जीएसटी कनून 2017 च कीते गेदे संशोधन मूजब करना ऐ।

<><><><><><>

House-Committees

जम्मू-कश्मीर विधानसभा नै अज्ज त्रै हाउस कमेटियें दे सदस्यें गी चुनने लेई इक प्रस्ताव पास कीता ऐ। मुख्मंत्री उमर अब्दुल्ला हुंदे आसेआ प्रस्तावित ते विधानसभा अध्यक्ष अब्दुल रहीम राथर हुंदे आसेआ पेश कीते गेदे इस प्रस्ताव गी ध्वनिमत कन्नै पास करी दित्ता गेआ। सदन नै लोक लेखा समिति यानि पब्लिक अकाउंट्स कमेटी, अनुमान समिति यानि एस्टीमेट कमेटी ते सार्वजनिक उपक्रमें आहली समिति यानि कमेटी ऑन पब्लिक

अंडरटेकिंग्स गी खडेरने आस्ते मंजूरी देई दिती ऐ। इनें त्रोंणं कमेटियें च 11-11 सदस्ये होडन ते इंदी मयाद 31 मार्च 2026 तगर होगा।

<><><><><><>

Sports-Khelo India

युवा सेवा ते खेडू मंत्री सतीश शर्मा होरें आखेआ ऐ जे सरकारै खेलो इंडिया स्कीम तैहत बरे 2018-19 च 14 करोड़ 75 लक्ख रपे दे 4 प्रोजैक्टें लेई जारी कीते जिंदे चा अजें तगर 13 करोड़ 67 लक्ख रपे खर्च कीते जाई चुके देन। 2 परियोजनां श्रीनगर ते जम्मू च सिंथेटिक हॉकी टर्फ दा कम्म मुकम्मल ऐ जिसलै कि होरनें दुए जियां सोपोर च एथलेटिक ट्रैक, बडगाम च इंडोर स्पोर्ट्स हाल दा कम्म जारी ऐ। मंत्री होरें साफ कीता जे खेलो इंडिया स्कीम केंद्र प्रायोजित स्कीम ऐ ते एहदे तैहत प्रदेश स्हाबै पैसा दिता जंदा ऐ नां कि हल्के स्हाबै।

<><><><><><>

Hockey-Poonch

पुंछ जिला ओपन हॉकी चैंपियनशिप च DYSSO नै रेल इलेवन गी फाइनल मुकाबले च 4-3 कन्नै हराइयै खिताब अपने नां करी लैता। इस टूर्नामेंट च कुल 8 टीमें हिस्सा लैता ते सब्भनें टीमें अपने-अपने मुकाबलें च शानदार प्रदर्शन पेश कीता। फाइनल मुकाबले च बतौर मुख परौहने दे तौरा पर शामिल पुंछ दे एडीसी ताहिर मुस्तफा मलिक होरें खडारियें दी खेडू भावना ते समर्पण दी तरफी कीती। इस मौके पर बोलदे होई मलिक होरें नौजवानें ते खेडू दी महत्वता पर लो पांदे होई आखेआ।

<><><><><><>

Football-Doda

सेहत जागरूकता ते नशीली दोआइयें शा मुक्त समाज गी बढावा देने दे उद्देश्य कन्नै डोडा च इक फुटबॉल टूर्नामेंट आयोजित कीता गेआ। जिले भर दियें 8एं टीमें इस टूर्नामेंट च हिस्सा लैता। एह टूर्नामेंट “Kick out drugs, score goals in life” आहले नारे दे उप्पर केंद्रित हा। एह टूर्नामेंट जेदे च खडारियें ते दर्शकें दी इक्के ज्नेही हिस्सेदारी दिक्खी गई, इक्क मनोरंजक फाइनल कन्नै सम्पन्न होई। एसएसपी डोडा संदीप मेहता जेडे फाइनल मैच च मुख परौहने हे, होरें प्रतिभागियें दे जज्बे दी सराहना करदे होई आखेआ जे रमजान दा पवित्र म्हीना होने दे बावजूद उनें बडे हौसले कन्नै टूर्नामेंट च हिस्सा लैता। इस मौके पर बोलदे होई एसएसपी डोडा संदीप मेहता होरें आखेआ।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 30 मार्च गी देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 120मीं किशत होगा। कार्यक्रम च शामिल करने लेई लोक अपने बचार ते सुझाहू 28 तरीक तगर टोल फ्री नंबर 1800-11-7800 पर भेजी सकदे ना। एहदे इलावा लोक अपने बचार

My Gov ते नरेन्द्र मोदी ऐप पर बी भेजी सकदे ना। एहू कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहगा। एहूदे कन्नो कन्नी एहूदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफतर ते सूचना ते प्रसारण मंत्रालय दे यूट्यूब चैनलें पर बी कीता जागा। आकाशवाणी जम्मू पर मन की बात दे तुरत मगरा एहूदा डोगरी च अनुवाद प्रसारत कीता जागा। एहूदा डोगरी अनुवाद तुस रातीं 8 बजे इक बारी परतियै सुनी सकदे ओ।

<><><><><><>